

KPÉDÉLÉ PÌYÉTÒRÒ Kpédélé bà cu wáràgà mì Piyétòrò

¹ Nìno a ye tí Piyétòrò tí tú mì Bìndi-Mbírì ká kù cu wáràgà tí nó jì ndâ mbe kù kili ta ɾè mì Bìndi-Mbírì, mbe 'vaaka go ndâ zà-za gó á ta ndi gbí ndâ to, Póndùsù, Kàpàdósìyà, Ásìyà ta ndâ to Bèsìniyà.

² Mbírì tí Bu ndoo táánò ɾuka yo á go có mì wó náa à sàà kuu gbí njembí wó; bìndi Bèri-mì-Mbírì gù kaa yo mò gí mì Mbírì, tacó wàa yo 'ví dù tí ndâ mbe 'di có mì Jézù tí Bìndi-Mbírì, wàa yí 'ví va mbelè wó mítí yo. Ye kù 'deke tí ye jì Mbírì máa, yí 'ví bàkà nambeè jì yo tókà'i, yí delè 'ví si 'bí i 'ví ba muu yo lá.

Wu bà koɾo có lí mítí Mbírì

³ Ndoò ùlù Mbírì tí Bu Mbe tí ndoo Jézù tí Bìndi-Mbírì, tí gbolò mbe nò yê ɾo ndâ 'duù, tacó a yí ká je ngú 'wálá jì ndoo ta bà 'vala ndi Jézù tí Bìndi-Mbírì mì wó 'do gbí muu'dú wó, náa ndoo kù koɾo có lí mítí .

⁴ Ndoò delè kù koɾo có lí mítí ndâ kpóló-kpolo i-nambeè tí nó náa ndú jé gí bà cee wálá, ndú gí bà volo wálá, ndú delè gí bà me tumbúzu wálá, náa Mbírì kù kpolo tí ndú mí gbírì tacó tí yo,

⁵ tí ndâ 'duù tí nó náa Mbírì kù kpolo tí yo ta wotí mì wó 'do gbí có bà tee njembí yo mítí wó

tí Mbíri nó, yee tí o bà co ɾi 'válá tí nó náa yí 'viindi sàà, tacó bà tùbà gí sè ta ndòngbú o nó.

⁶ À má ènò, yo dù ta tàkòcò yo pètékè'i, yo kpètí kpónó má kù ngì káa nge ta ndâ kpíkpa'dà ɱa vò i má gàà kózò gi nó.

⁷ Ndâ vò i tí nó mbe kù ngì nge ta yo nó kù tala a yo tacó bà ɱò ènó máa, yo kù tee njembí yo mítí Mbíri ta yúco wè. À kpètí káa dâ'bì, tí i ɱinó náa àá bà cee ta ndòngbú o gí nó, à kù tala bà ɱò tó ni a i ta wu. Káa bà tee njembí yo mítí Mbíri a kpóló-kpolo i kùro Mbíri ndii dâ'bì gí. À má ènò, yo má kpòò kù tee káa njembí yo mítí Mbíri bìndi bà ngì nge mì ndâ vò i ta yo, àá bà ùlù yo, àá bà ɱò ngba yo, à delè bà te duù mítí yo wúnò ta o bà gí Jézù tí Bìndi-Mbíri.

⁸ Yo kpètí jé má ɱò yí ta ɾo yo lá, yo zè yí ñikí ma. Yo kpètí kpónó má me kù ɱò yí ta ɾo yo lá, yo ùnje gítí wó gí; tàkòcò yo delè peteke tí ɱa ɱinó náa bà 'dè có gítí kpò yo gí ta líkí'o,

⁹ tacó i ɱinó náa yo 'de 'do gbí bà tee njembí yo mítí Mbíri nó a bà 'vala lilí yo.

¹⁰ Ndâ mbe 'dòkò có mì Mbíri mbe 'dè-kòcò gítí nambeè mì Mbíri nó táánò pà 'válá tí nó ta nje-gbí.

¹¹ Ndú táánò kù pà ɱa 'duù tí nó, ndú delè kù pà ɱa o tí nó, ta o tí nó náa Bèri mì Bìndi-Mbíri gbí njembí ndú má kù 'dè-kòcò gítí bà kònò ndâ sé'i mì Bìndi-Mbíri, ta bà tòngbaà mì wó bìndi bà kònò ndâ sé'i tí nó nó.

¹² Mbíri táánò 'dè có ji ndâ mbe 'dòkò có mì wó máa, ndú táánò kù bàkà nèté tí nó me gítí miɾi ndú lá, ndú kù bàkà a nèté yo; ɱinò a ndâ i

tí nó náa ndâ mbe ma Banga-Ngú-Có kò ta kò ji yo ta wotí mì Bèrì-mì-Mbířì tí nó náa à tuu yí 'do gbířì ji yo nò. À kpétí káa ndâ basìlì mì Mbířì, go bà 'dì ndâ có tí nò táánò kuu tí ndú.

À tè'é tí yo a i gítí tó bà 'vala ndò

¹³ À má éno, yo 'viindi muu yo gítí nèté. Yo si ndâ i 'ví gbaaka yo lá, wàa yo 'ví kořo có 'dáá gí lli a i mítí i-nambeè tí nó náa áa kèjì gí bà je ji yo ta o bà gí Jézù tí Bìndi-Mbířì nò.

¹⁴ Yo 'dì có mì Mbířì, tacó yo a ndâ 'viì mì wó; yo dù ta go ndâ vò i go ŋa i tí nó náa yo táánò kù bàkà sù yo 'dì gbí-o lá nó lá.

¹⁵ 'Duù tí nó mbe tè'é tí yo nó mò tí wó 'do tí ndâ vò i gí, à má éno, yo delè 'ví mò tí yo 'do tí ndâ vò i 'dáá gí go ñìndi wó nò.

¹⁶ Tacó à cu mí gbí wáràgà mì Mbířì éno máa, «Yo mò tí yo 'do tí ndâ vò i gí, tacó ye mò tí ye 'do tí ndâ vò i gí nò»

¹⁷ Káa yo má kù nì Buù mítí 'duù tí nó tí Mbířì mbe kù waa có mítí ndâ 'duù 'dáá gí 'vii ta cè ŋa bà bàkà i mì ndú nó, yo 'ví kpolo tí yo ta gúku wó ta o tí nó 'dáá gí náa yo kù 'vala muu to tí nò.

¹⁸ Yo ñò ni gí, máa, áa táánò sù muu yo 'do gbí ndâ ŋa vo-vò kpokèjì 'valá tí nó náa yo řuka 'do bìndi ndâ bu yo nó me ta ndâ i ñìnó náa ndú bà cee gí, go ndâ dâ'bì, ta fádà, nó lá;

¹⁹ à sù muu yo a i ta mbelè Bìndi-Mbířì náa à me i bà ŋo ta 'dì lá, go mbelè 'viì-rómbo ñìnó ta mbó tí wó wálá náa à kù ci ji Mbířì nò.

²⁰ Mbířì táánò cu 'bì wó mítí wó kùřo o bà suu to tí nò, káa yí gii túbà tí wó a i gbí ndâ ndòngbú o tí nó tacó tí yo.

²¹ Yo kpónó kù tee njembí yo mítí Mbírì tí nó mbe te yí gí yaà 'do gbí ku, bìndi yí gù je wotí jì yí nó, 'do gbí có mì wó, tacó éno, yo kù tee njembí yo tí kpoò mítí Mbírì, yo delè kù koṛo có 'dáá gí lì mítí wó.

²² Yo kpónó bàkà lilí yo ngbárángà'i ta bà 'di yúcó, tacó bà zè tí yo gbí òkò tí yo nìkì go i mì ndâ ná'vindí ta tìrì gbí wálá. Yo zè tí yo gbí òkò tí yo nìkì ta njembí yo gbaànjé.

²³ Tacó àá táánò jò ndi yo káká'i me 'do tí nji ṇa ṇínó mbe pìì nó lá; à jò yo a i 'do tí nji ṇa ṇínó mbe pìì lá ká dúú bà ya tí, 'do gbí wu có mì Mbírì mbe dù tí ká nò.

²⁴ Tacó à cu mí gbí wáràgà mì Mbírì máa,
«Ndâ 'duù 'dáá gí go mbílì,
bìndi ndâ banga i mì ndú 'dáá gí go 'vì mbílì.
Mbílì má aanga gí,
ndâ 'vì wó kù 'duku gí to,

²⁵ káa có mì Mbírì kù dù tí ká.»
Có tí nò mì Mbírì nò a Banga-Ngú-Có tí nó náa àá táánò ma jì yo nò.

2

Wu díí ta ndâ tó 'duù

¹ Yo duu gùù wàa yo 'ví nè ndâ vò muu 'dáá gí, ta ndâ 'vèrè, ta ndâ i-còkòndé, ta kù, gù je ndâ vò nje mí gbí .

² Yo dù go ndâ dó 'vii, yo wa cèe ngo kí 'do mì Mbírì, tacó wàa yo 'ví uu tí gí gbí 'válá,

³ tacó yo tala líkí nambeè mì Mbe tí ndoo gí.

4 Yo gí mí m̀ Mbe tí ndoo, tí wu díí tí nó náa ndâ 'duù táánò bè gí máa, i gbí wálá, káa Mbírì g̀i cu 'bì wó mítí , máa i gbí me gbolò nò.

5 Yo kpónó delè gí tí ndâ wu díí tacó bà bì ta 'bá jì Mbírì g̀i, yo a ndâ bu-Mbírì mbe kaa tí yo mò gí mí Mbírì g̀i, mbe kù ci ndâ i ònó mbe nìkì tí Mbírì g̀i nó jì yí, ta ẹ̀rè m̀ Jézù.

6 Á go có tí nó náa à cu mí gbí wáràgà m̀ Mbírì éno máa, kòcò Mbírì máa,

«Ye kù te díí m̀ ye á mí pí gú Ziyónì,
tí díí náa ye cu 'bì ye mítí ,
ta i gbí me gbolò,

à delè bà te nò mí ọ̀ mbe ùnje gítí wó wálá.»

7 À má jì yo tí ndâ mbe ùnje gítí wó, i gbí wó me gbolò, káa à má jì ndâ 'duù ònó mbe ùnje gítí wó lá nó, yí a i mbe kù tò kò ndú, a go có tí nó náa à cu mí gbí wáràgà m̀ Mbírì máa,

«Gbèè díí tí nó náa ndâ mbe bì 'bá táánò bè gí nó ká gí tí kpédélé díí bà sè tà 'bá,» nò.

8 À delè g̀i cu mí gbí wáràgà m̀ Mbírì káká'ì éno máa,

«Díí tí nò bà dù tí I náa ndâ 'duù kù tò kò ndú tí ;

díí tí nò bà dù tí díí mbe 'va ndâ 'duù mí to.»

Ndú kù tò kò ndú tacó t̀ ndú kpò bà 'dì có m̀ Mbírì g̀i, á tí ọ̀a i gbí kù ndú.

9 Káa yo a ndâ 'duù ònó náa Mbírì ọ̀ka yo gbí ọ̀a yo 'dáá g̀i tí ndâ 'dóó 'duù ònó m̀ wó g̀i, ọ̀a yo a tó ọ̀a m̀ Mbírì, ọ̀a yo a ndâ bu-Mbírì m̀ Mbírì náa yí ọ̀ka yo tí ndâ mbe ma có ndâ kpo-kpò i tí nó náa yí tí mbe tè'é tí yo táánò 'do gbí 'dí'dì'o gí gbí gbolò ngba'o m̀ wó bàkà nò.

10 Yo táánò sàà kù 'vala ká jááká-jaaka, káa yo kpónó a ndâ 'duù mì Mbírì; Mbírì táánò sàà ò yê ọ yo lá, káa yí kpónó kù ò yê ọ yo.

Ndâ bòò mì Mbírì

11 Ye kù 'deke a tí ye ji yo, ndâ ná'vindí, máa, yo kpónó go ndâ mbe 'dó-'do á 'bá ku'dì, à má énnò, yo 'ví si tí yo ji ndâ i-gbí-kù yo mbe kù tè lílì yo ta go nó lá.

12 Yo 'vala ta tó muu gbí òkò tí ndâ 'duù ònó mbe ò dúú kpokèjì bà bàkà nambeè ta Mbírì ni lá nò, tacó wàa, ndú kpétí má 'dè vò có gítí yo, máa yo a ndâ mbe bàkà vò i, ndú má ò ndâ tó i tí nó náa yo kù bàkà nó, ndú wúnò 'ví ùlù ta Mbírì ta ọ bà gí yí gí bà waa có mítí ndâ 'duù ta ndòngbù o.

13 Yo 'ví 'di có mì ndâ 'duù tí nó 'dáá gí náa à bàkà ndú tí ndâ kpo 'duù kùro yo nò ta ọ mì Mbe tí ndoo. Yo 'di có mì gba tí gbolò 'duù kùro ndú 'dáá gí;

14 yo delè 'ví 'di có mì ndâ 'duù tí nó náa gba je wotí bà waa có mítí ndâ mbe bàkà vò i, ta wotí bà ko mboo nèté mì ndâ mbe bàkà tó i ta tó i ji ndú nò.

15 Tacó có gbí njembí Mbírì éno máa, ndâ tó i mì yo náa yo kù bàkà nó 'ví nè nje ndâ mbe ò yúco ni lá nó gí tàkò ndâ có ònóko mì ndú.

16 Yo 'vala go ndâ 'duù ònó mbe kù bàkà go có mì ndú náa à gbí njembí ndú, káa yo 'ví si bà bàkà go có mì yo náa à gbí njembí yo nó tí i bà 'buuku muu ndâ vò i mì yo lá, yo 'vala go ndâ bòò mì Mbírì.

17 Yo 'ví te 'duù mítí ndâ 'duù 'dáá gî, yo 'ví zè tí yo gbí òkò tí yo tí ndâ ná'vindí nìkì maa, yo 'ví cì gúku tí Mbírì, wàa yo 'ví te duù mítí ndâ gba mì yo.

Yo nò 'do tí bà kònò sé'i mì Bìndi-Mbírì

18 Yo tí ndâ bòò 'ví te duù mítí ndâ mbe tí yo; yo delè 'ví 'di có mì ndú, káa yo 'ví 'di me káa có mì ndâ ñinó mbe kù bàkà nambeè ji yo nó lá, yo delè 'ví 'di có mì ndâ ñinó mbe kù bàkà i tí yo nìkì lá nò.

19 Tacó Mbírì bà cù 'dê ngo cù wó mítí yo, náa yo má kònò ndâ vò i tí nó náa à kù bàkà ta yo ta nderè ndú wálá nó ta rẹ̀ mì wó nò.

20 Tacó à gbí bà kònò sé bà gbì tí a yè náa à má gbì 'duù 'do gbí vò i mì wó nò? Káa 'duù má kònò sé'i a i tacó bà bàkà tó i, Mbírì bà cù 'dê ngo cù wó mítí 'duù tí nò gî.

21 Mbírì táánò tè'é tí yo tacó bà kònò sé'i muu bà bàkà tó i, tacó Bìndi-Mbírì táánò kònò sé'i muu yo, bìndi yí gù si yo máa yo 'ví co tí kpokèjì tí nó bìndi yì nò.

22 Yí táánò bàkà vò i lá, 'bí 'duù jé mbe 'di ngò gbí nje wó wálá.

23 Áá táánò má go yí, yí 'visì ngò gí tàkò ngò tí nó lá; àá táánò má bàkà vò i ta yí, yí toṛo mítí wó ká tí bàà, yí si ndâ vò i ndâ ngò tí nó náa à bàkà ta yí nò 'dáá ji Mbírì tí mbe waa yúco.

24 Bìndi-Mbírì táánò te du ndâ vò i mì ndoo gbí dìì wó ya tí gítí njèèkpè mû, tacó wàa ndoo 'ví bàkà vò i káká'i lá, wàa ndoo 'ví 'vala tí ndâ 'duù jáá kùro Mbírì; ndâ kà mì wó 'vala yo gî.

²⁵ Yo táánò giṛi'o go ndâ rómbo nó gî, káa à kpónó dele ta yo gí mì mbe gbà yo go bà gbà ndâ rómbo, mbe kù kpolo tí lilí yo nó gí.

3

Ndâ nawù 'dakò ta ndâ kù ndú

¹ Yo tí ndâ nawù 'dakò 'ví 'di có mì ndâ kù yo, tacó wàa, ndâ 'bí 'duù gbí òkò tí ndú kpétí má biya bà 'di có mì Mbíṛi gî, tó cè bà bàkà i mì yo 'ví si ndú 'ví 'di có mì Mbíṛi. Yo 'ví 'dè có ji ndú ta nje yo máa ndú 'di có mì Mbíṛi nò gbaànjé lá,

² tacó ndú bà òò 'do ká tí cè òò bà te duù mì yo, delè 'do tí cè òò bà tègàrà rẹ Mbíṛi mì yo.

³ Yo 'ví dù cuki me ká tí ndâ na banga mbe kù yuu káa ndâ banga bongo, ta bà leke ndâ kpo-kpò i-banga ngbeze-ngbèzè ta ndi gbí muu yo, lá.

⁴ Banga mì yo 'ví nguù tí wó a i mí gbí njembí yo, tí òò banga òò mbe cee lá, tí banga mì 'dè njembí, ta tó muu, tí ndâ kpóló-kpolo i kùro Mbíṛi.

⁵ Tacó ndâ niì tí nó gbí ndâ ká o dígísèé mbe kaa tí ndú ji Mbíṛi gî, mbe kù koro có lì mítí Mbíṛi nó, te a òò banga tí òò kù 'di ta có mì ndâ 'dakò mì ndú,

⁶ go bà 'di có mì Àbìráámò mì nawù wó Sàrà dígísèé, náa yí táánò kù niì mítí Àbìráámò káa, «Mbe tí ye» òò. Káa yo kpónó a ndâ nájú Sàrà, náa yo má bàkà i òò mbe 'vii ro 'bá wàa, yo delè 'ví si 'bí i 'ví te gúku mítí yo lá òò.

⁷ Yo tí ndâ 'dakò delè 'ví 'vala ta ndâ nawù yo gbí tó kpokèjì, yo te duù mítí ndâ niì mì yo, tacó ndú a ndâ 'duù òò ta wotí mì ndú me njí'dí. Yo

delè 'ví te mì gbí muu yo éno máa, ndâ nawù yo a ndâ 'duù ñinó náa Mbíri je 'válá tí i-nambeè ji yo gbaànjé ta ndú. Yo bàkà éno tacó wàa 'bí i 'ví nè kpokèjì bà ñò bà 'deke tí yo mì Mbíri lá.

Yo kònò sé'i muu bà bàkà i ñinó dú nò

⁸ Ndòngbú có mì ye ji yo éno máa, yo 'dáá gí 'ví koṛo káa gbèe có; 'bí ka yo má ta líkí'o tí wó, yo 'dáá gí 'ví dù ta líkí'o tí yo, o má volo tí wó gí, o delè 'ví volo tí yo 'dáá gí. Yo zè tí yo ñikí gbí òkò tí yo go ndâ ná'vindí, yo dù ta 'dê njembí yo, yo delè 'ví me tí yo tí i lá.

⁹ Yo 'ví ko mboo vò i ta vò i lá, 'duù má 'dè vò có gítí yo, yo 'ví toṛo mítí yo tí bàà; yo 'ví 'deke tí yo ji Mbíri máa, yí cù 'dê ngo cù wó mítí ndâ mbe bàkà vò i ta yo, ta ndâ mbe 'dè vò có gítí yo, tacó Mbíri táánò tè'é tí yo a i tacó wàa yì 'ví cù 'dê ngo cù yì mítí yo.

¹⁰ Tacó à cu mí gbí wáràgà mì Mbíri éno máa, «Duù ñinó ta go bà 'vala ta pétékè tàkòcò wó, wàa 'bí i 'ví ba muu wó lá tí wó nó, 'ví kpolo tí mè wó á 'do tí vò có, Yí delè 'ví nè nje wó á 'do tí bà 'dè tiṛi.

¹¹ Yí 'ví 'visì muu wó á 'do tí bà bàkà vò i á gítí bà bàkà tó i.

Yí 'ví pà kpokèjì ñinó ta 'bí i mbe ba muu ndâ 'duù ba tí wálá nó, wàa yí 'ví nanaka muu wó á mítí .

¹² Tacó ṛo Mbe tí ndoo ta o 'dáá gí ká ngbóó tí ndâ 'duù ñinó mbe kù co tí jáá kpokèjì nò, tù wó delè ká kácáá gbí njè ndâ mbe kù 'deke tí ndú á káa yí 'visì kapí wó á gítí ndâ mbe kù bàkà vò i gí.»

13 A 'di ká bà bàkà vò i ta yo, náa à má tí yo a go bà bàkà i ñìnó mbe 'vii ro 'bá nó?

14 Káa yo kpétí kpónó má kù mbu ta ɾè mì i ñìnó jáá kùro Mbíri nó, yí bà cù 'dê ngo cù wó mítí yo gî. À má éno, yo 'ví cì gúku tí ndâ 'duù lá, njembí yo delè 'ví mù gítí ndú lá.

15 Káa yo 'ví ùlù tí Bìndi-Mbíri, tí Mbe tí yo, ta njembí yo gbaànjé. Yo delè ta o 'dáá gî 'ví dù ká léngé-lenge kù ù bà 'visì có ji ndâ mbe 'vee yo gítí bà 'dè gbí nderè i tí nó náa yo kù koɾo có lì mítí nô, káa yo 'ví 'dè ji ndú ta pétékè có, ta bà cì gúku tí Mbíri,

16 delè ta ngbárángà njembí yo, tacó wàa 'duù má 'dè có ñónókó mítí yo, ndâ 'duù 'ví te nô mí ro 'duù tí nó mbe 'dè vò có mítí yo nó, tacó tó cè bà bàkà i mì yo ta ɾè mì Bìndi-Mbíri.

17 Tacó à niki a bà kònò sé'i muu bà bàkà i ñìnó dú nó, náa à má a có mì Mbíri nó, co tí bà kònò sé'i muu bà bàkà lé-lè i.

18 Tacó Bìndi-Mbíri táánò tí yê ta vò i mì wó gbaànjé kùro Mbíri wálá, cì ta bà gbaànjé cuki tacó vò i mì ndâ mbe bàkà vò i 'dáá gî, tacó wàa yí 'ví kaa ndoo ya tí ji Mbíri. Áá táánò zi yí ta dii wó, káa à gii 'vala ndi wó 'do gbí muu'dú wó ta lilí wó,

19 náa yí gii ya tí gí bà ma Banga-Ngú-Có mì Mbíri ji ndâ lilí ñìnó gbí zàà nô.

20 Ndâ lilí tí nó náa lilí Bìndi-Mbíri táánò ya gí bà ma Banga-Ngú-Có ji ndú gbí zàà nó a ndâ lilí ndâ 'duù tí nó táánò mbe kpò có mì Mbíri gî, ta o tí nó náa Mbíri táánò ù ta ndú kpòò, máa ndú bà 'visì muu ndú 'do tí ndâ vò i mì ndú si Nówà kù bàkà gbâ tacó bà 'vala ndâ 'duù 'do tí gbolò ngo

mù nò. À ta o tí nò 'vala 'do gbí òkò tí ndâ 'duù to tí nó 'dáá gî káa ndâ 'duù vô-nje ta'ò cuki.

²¹ Ngo táánò 'vala Nówà ta ndâ 'duù tí nó ta yí gbí gbâ nó go bà 'vala ndoo mì ngo ta bà caka tí ndoo ta rẹ̀ mì Bìndi-Mbírì. Ngo bà caka tí ta rẹ̀ mì Bìndi-Mbírì kù caka bẹ̀tí 'do me ká kápí kù ndoo cuki lá; ngo tí nò a i mbe kù 'deke tí wó jì Mbírì, tacó wàa yí 'ví si njembí ndoo 'ví dù ngbárángà'i ta rẹ̀ mì bà 'vala ndi Bìndi-Mbírì 'do gbí muu'dú wó,

²² mbe ya gí gbírì kù kí tí wó gbí kù'bì mì Mbírì tí gba mbe zogo ndâ basìlì ta ndâ kpo-kpò bààcì.

4

Yo 'ví kònò sé'i muu to tí nó go i mì Bìndi-Mbírì

¹ À má éno, Bìndi-Mbírì lê táánò má kònò sé'i si yí kù 'vala muu to tí nó gî, yo 'dò kò yo mì to tí kpoò gítí bà kònò sé'i go ñìndi wó nò, tacó 'duù mbe kù kònò sé'i á muu to tí nó ta rẹ̀ mì Bìndi-Mbírì nó si bà bàkà vò i mì to gî.

² À má éno, yo kpónó 'ví 'vala sè 'válá mì yo muu to tí nó me ta go bà mòkò tàkò ndâ i muu to tí nó go i mì ndâ vò 'duù lá, yo 'vala go có mì Mbírì.

³ Tacó bà ndâ ña o tí nó náa yo táánò kù 'vala go i mì ndâ mbe ñò dúú kpokèjì bà bàkà nambeè ta Mbírì ni lá nó kpónó cee gî. Yo táánò kù 'vala ká dúú ènò gí kà ta 'bí i mbe kili nje yo gí 'bá wálá, yo gbí ndâ o tí nó kù dù ta go bà bàkà ndâ vò i, 'válá mì yo táánò káa bà sa ta pe, ta bà pìi wo ta pe, ta bà tì pe, ta bà bàkà go có mì ndâ sù mbírì.

⁴ Nje ndâ 'duù ñìnó mbe ñò dúú kpokèjì bà bàkà nambeè ta Mbíri ni lá nó kpónó 'dèè gítí ña ngú kpokèjì bà 'vala yo nó gî; ndú kú 'vee 'vé gbí òkò tí ndú ta kpéetí ndú, máa, a yè káa yo kpónó 'vala ña bà 'vala ndò tí nó táánò mì yo ta ndâ yì, náa yo kú bàkà káa ndâ i sàkàmàà go i mì ndâ nò gbí jìlì, lá nó wè? Tacó éno, ndú kú nì rẹ yo.

⁵ Káa ndú wúnò bà 'deke ndâ vò i mì ndú náa ndú kpónó kú bàkà nó gbaànjé-gbaànjé 'dáá gí mì kùro 'duù tí nó kpónó mbe 'viindi tí wó gítí bà waa có mítí ndâ 'válá ta ndâ ku gí nó gí.

⁶ Tacó gbí nderè có tí nó náa àá táánò ma ta Banga-Ngú-Có jì ndâ ku nò éno máa, àá táánò má waa có mítí ndú si ndú kú 'vala muu to tí nó gí, delè ndú 'ví 'vala go bà 'vala Mbíri.

Ndâ mbe banda ndâ i-nambeè mì Mbíri

⁷ Ndòngbú o kpónó dooko gí; à má éno, yo dù ta tó muu, yo delè 'ví dù ta njembí yo lèè tacó bà 'viindi tí yo gítí bà 'deke tí yo jì Mbíri.

⁸ Káa kpóló-kpolo có ngé ndii gí a ñìnó máa, yo 'ví zè tí yo gbí òkò tí yo ñikì maa, tacó tó bà zè tí kú si ndoo 'ví toro ndâ vò i tí nó náa ndâ 'bí ka ndoo bàkà ta ndoo nó tí bàà mítí ndoo.

⁹ Yo 'ví te wiři mítí ndâ 'bí ka yo ta bà 'dè ngùrù-ngùrù có lá.

¹⁰ Mbíri njèè i-nambeè jì yo gbaànjé-gbaànjé 'dáá gí gí. À má éno, yo bàkà nambeè jì ndâ 'bí 'duù ta ndâ ña i-nambeè tí nó náa yo 'de nò go i mì ndâ tó mbe kú kpolo tí ndâ i gbí gálá nambeè mì Mbíri.

11 Mbíri má wu mí gbí nje lo a bà 'dè có, wò 'ví ma có mì Mbíri ká goolá a yí tí Mbíri ká kù ma . Mbíri má wu ji 'duù a bà bàkà nèté ndâ 'duù, 'duù tí nò 'ví bàkà ta wotí tí nò náa Mbíri je ji yí nò tacó wàa, ndâ 'duù 'ví ùlù Mbíri gbí ndâ i 'dáá gí ta rẹ̀ mì Jézù tí Bìndi-Mbíri. À ùlù Bìndi-Mbíri tí mbe wotí kpòò ya tí ! Go-i-tí-nò.

Bà kònò sé'i go 'duù mì Bìndi-Mbíri

12 Nje yo 'ví 'dèè gítí ña bà kònò sé'i tí nó náa yo kpónó kù kònò goolá a 'bí tende i ká kù bàkà tí nó lá, ndâ ná'vindí.

13 Yo dù ta tàkòcò yo pétékè'i, tacó bà dù yo tí ndâ mbe kù gbo gbí bà kònò sé'i ta Bìndi-Mbíri nò, tacó tàkòcò yo wúnò bà peteke ngé ndii gí ta o bà túbà ngba Bìndi-Mbíri.

14 À tí yo a tó pá, náa ndâ 'duù má kù go yo ta rẹ̀ mì Bìndi-Mbíri nò, tacó ñìnò kù túbà ji yo máa Bèri mì ngba'o tí Bèri-mì-Mbíri kuu tàkò yo.

15 Káa 'bí 'duù gbí òkò tí yo 'ví kònò sé'i muu bà zi ku lá, 'bí 'duù 'ví kònò sé'i muu bà ngbà i lá, 'bí 'duù 'ví kònò sé'i muu bà bàkà vò i lá, 'bí 'duù 'ví kònò sé'i muu bà yuu tí wó á gí gbí có ñìnó ta rẹ̀ wó gbí wálá nó lá.

16 Káa 'bí 'duù gbí òkò tí yo má kònò sé'i muu bà dù tí mbe ùnje gítí Bìndi-Mbíri, 'duù tí nò 'ví kù nò lá, yí 'ví ùlù Mbíri tacó rẹ̀ tí nó muu wó máa yí a mbe ùnje gítí Bìndi-Mbíri nò.

17 Tacó o bà 'bìtà bà waa có kpónó yee gí; à kù 'bìtà bà waa có tí nò a i mítí ndâ 'duù 'bá mì Mbíri. Káa à má kù 'bìtà bà waa có a i mítí ndoo, bà yee nje mítí ndâ 'duù ñìnó mbe biya bà ùnje

gítí Banga-Ngú-Có mì Mbířì gî nó, bà dù go ña yè?

¹⁸ Káa à cu mí gbí wáràgà mì Mbířì máa,
«Bà 'vala ndâ 'duù ñìnó jáá kùro Mbířì nó má
kpóló-kpolo, ndâ 'duù ñìnó ta Mbířì mì
ndú wálá nó, ta ndâ mbe bàkà vò i,
bà řì tí ña ñjè ngàyi?»

¹⁹ A má éno, ndâ 'duù ñìnó mbe kù kònò sé'i ta
rè mì Mbířì nó 'ví bàkà tó i, ndú delè 'ví si lilí
ndú mí 'bì mbe suu ndâ i 'dáá gî tí mbe kù kpolo
tí cí mì wó.

5

Ndâ 'duù mì Mbířì

¹ À má éno, ye kù 'deke tí ye ji ndâ kpo 'duù
gbí òkò tí yo, ye tí ka ndú kpo 'duù, tí mbe kù
'de yúco gítí bà kònò ndâ sé'i mì Bindi-Mbířì, ye
delè bà dù gbí ngba wó ta o bà gî yí wúnò ta ndâ
'bí ka ye. Kòcò ye ji yo éno máa,

² yo 'ví gbà ndâ rómbo tí nó mì Mbířì náa yí
kaa ndú ji yo máa yo kpolo tí ndú nò me tacó
máa à bàkà yo ta wotí gítí bà gbà ndú nò lá, yo
gbà ndú 'do gbí 'dóo có mì yo gbí njembí yo; yo
'ví gbà ndú me tacó bà zò i gbí ndú lá, yo gbà
ndú ta go bà gbà ndú tí yo;

³ yo 'ví bàkà i tí ndú me go bà bàkà i tí ndâ
i-zógó-zogo mì yo lá; yo dù tí ndâ 'duù ñìnó náa
ndâ rómbo tí nó 'ví mèlè ndi tó cè bà bàkà i mì
yo.

⁴ Bindi ta o tí nó náa gbolò Mbe gbà rómbo bà
gî wúnò nó, yí bà ko mboo nèté mì yo ji yo ta
ngba'o ñìnó jé mbe me mérè-mérè lá nô.

⁵ Ndâ 'viì delè 'ví si ndâ mbe òò ọọ ọọ kùro ji ndú tí i. Wàa yo 'dáá gí 'ví bàkà dì tí gbí òkò tí yo lá, tacó có mì Mbíri máa,

«Có mì Mbíri toko ta ndâ mbe kù mba tí ndú lá, káa yí kù bàkà nambeè ji ndâ mbe si tí ndú tí i lá.»

⁶ À má éno, yo si tí yo tí i kùro Mbíri tí gba mì yo lá, wàa a yí ká 'ví bàkà yo tí i ta o mì wó náa à gbí njembí wó.

⁷ Yo kpili ndâ i tí nó mbe kù mù njembí yo nó 'dáá gí ji yí, tacó a yí ká kù kpolo tí yo.

⁸ Yo si muu yo 'ví dù ngbàrángà'i, tacó Gba-vò-i tí mbe kù jòò gbí có ta yo kpónó kù jèlè to go siingù mbe kù ẹnà kù pà 'duù tacó bà zi yí.

⁹ Yo tè gí tàkò có mì wó lá; yo tee njembí yo mítí Mbíri tí kpoò, tacó yo òò ni gí máa, ndâ ná'vindí yo mbe ùnje gítí Bindi-Mbíri cee muu to tí nó 'dáá gí kù kònò káa gbèe ọọ sé'i tí nó náa yo kpónó kù kònò òò.

¹⁰ Káa yo má kònò sé'i tí nó ta làmbu o gàa éno gí, à ká a 'dóó yí tí Mbíri tí nó tí mbe nambeè táánò mbe tè'é tí yo gí gbí ngba'o òò mbe cee lá ta ẹnè mì Bindi-Mbíri no ká kèjì gí bà gbì búlù tí yo, à ká a yí ká bà si yo 'ví te duù mítí njembí yo, à delè ká a yí ká bà je wotí ji yo.

¹¹ Mbíri 'ví dù tí gba ká dúú bà ya tí ! Go-i-tí-òò.

Ndòngbú 'vé

¹² Ye kù tuu a Silivánò tí nó náa ye òò yí gbí njembí ye tí ná'vindí mbe kù tee njembí wó 'dáá gí mítí Mbíri nó, ta wáràgà tí nó ji yo. Ye cu ndò wáràgà tí nó ji yo tacó bà je wotí ji yo, delè tacó

bà 'dè có ji yo gítí yúcó kpokèjì bà bàkà nambeè
mì Mbírì náa yo kpónó gbí nò.

¹³ Ndá mbe kù kili ta ọ̀rè mì Bìndi-Mbírì gbí
gbata Bàbìlóniyà kàá, náa Mbírì cu 'bì wó mítí
ndú ká go bà cu 'bì wó mítí yo, gù je 'viì mì ye
Márikò, 'vee yo ngé ma.

¹⁴ Yo 'vee tí yo gbí òkò tí yo ta bà òlò gbí tù yo
ta njembí bà zè Mbírì.

Mbírì 'ví si yo ndá mbe kù kili ta ọ̀rè mì Bìndi-
Mbírì 'dáá gí 'ví dù nìkì maa.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa